



Iesus reprend les Iuifs de ce qu'ils le cherchoient plus pour la nourriture terrestre que pour la celeste.

LES Iuifs ayans eu connoissance que Iesus auoit passé la mer sans aucun bateau, ils en furent émerueillez, & vinrent en Capharnaum, où ils le trouuerent, & luy dirent : Maistre, comment es-tu venu icy ? Iesus répondit, En verité ie vous dy, Vous me cherchez, non point pour auoir veu des signes: mais pource que vous auez mangé des pains, & auez esté rassasiés. Trauaillez pour auoir de la viande, non point de celle qui perit, mais de celle qui est permanente en la vie eternelle, laquelle le Fils de l'homme vous donnera, car le Pere qui est Dieu, l'a marquée de son cachet. Alors ils luy dirent, Que ferons-nous pour ouurer les œuvres de Dieu ? Iesus leur dist, L'œuvre de Dieu, c'est que vous croyez en celuy qu'il a enuoyé. Et ils dirent, Quel signe donc fais-tu, afin qu'en le voyant nous te croyons ? Nos peres ont mangé la Manne au desert, ainsi qu'il est écrit : Il leur a donné à manger le pain du Ciel. Et Iesus leur dist, En verité ie vous dy, que Moysse ne vous a point donné le pain du Ciel, mais mon Pere vous donne le vray pain du Ciel: car celuy est le vray pain, qui est descendu du Ciel, & qui donne vie au monde.

Saint Iean Chap. 6.